

VENDIM
Nr. 111, datë 1.7.2016

MBI LËNIEN NË FUQI TË VENDIMEVE NR. 139, NR. 141, NR. 145, NR. 146, NR. 147, NR. 148, DATË 26.12.2014, TË BORDIT TË KOMISIONERËVE TË ERE-s, PËR PERIU DHËN 1 KORRIK 2016–31 DHJETOR 2016

Në mbështetje të neneve 10, pika 2; 16; 20, germa “c” dhe 109, pika 5, të ligjit nr. 43/2015, “Për sektorin e energjisë elektrike”, VKM-së nr. 244, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike” dhe nenit 22 të “Rregullave të praktikës dhe procedurave të ERE-s”, miratuar me vendimin e Bordit të Komisionerëve të ERE-s nr. 96, datë 17.6.2016, të ndryshuar, Bordi i Entit Rregullator të Energjisë (ERE), në mbledhjen e tij të datës 1.7.2016, pasi shqyrtoi relacionin e drejtorive teknike,

konstatoi se:

- Problematika e marrëdhënieve të ndërsjella, që ishte një nga shkaqet kryesore të mosaxhustimit të të ardhurave që i përkasin periudhës 2012–2014, si dhe vendimit nr. 156, datë 24.12.2015, vazhdon të ekzistojë.

- Asnjë nga kompanitë nuk ka paraqitur axhustime të periudhave të mëparshme të vitit 2015, si dhe 6-mujorit të parë të vitit aktual.

- Aplikimi i OSHEE-së dhe OST-së konsiston në llogaritje të të ardhurave të kërkuara për periudhën njëvjeçare.

- Mungesa e mbajtjes së llogarive të ndara për aktivitetin e shpërndarjes dhe të furnizimit apo dhe alokimi i kostove reale në nivelin tensioni, si pasojë e vështirësive që paraqet mbajtja e llogarive në kompani.

- Aktiviteti i furnizimit universal (furnizim me pakicë) tashmë duhet të reflektojë dhe kostot e aktivitetit të transferuar nga FPSH-ja nga data 1 korrik 2016. Në lidhje me këtë transferim nuk disponojmë asnjë dokument apo vendim të pronarit për mënyrën e transferimit të aktivitetit, duke përfshirë dhe kostot përkatëse.

- Në lidhje me përcaktimin e të ardhurave të kërkuara të aktivitetit të gjenerimit duhet të bëhet në përputhje me metodologjinë përkatëse, në respekt të ligjit nr. 43/2015 dhe VKM-së nr. 244, “Për miratimin e kushteve për vendosjen e detyrimit të shërbimit publik, që do të zbatohen ndaj të licencuarve në sektorin e energjisë elektrike, të cilët ushtrojnë aktivitetin e prodhimit, transmetimit, shpërndarjes dhe furnizimit me energji elektrike”. Siç vërehet nga aplikimi i KESH sh.a. të ardhurat e kërkuara për aktivitetin e prodhimit publik, përfshijnë dhe elemente të të ardhurave të përcaktuara në metodologjinë e FPSH-së.

- Metodologjitë e reja në përputhje me modelin e përkohshëm të tregut janë akoma në proces rishikimi në bashkëpunim me konsulencën e USAID-i dhe konsultimi me Sekretariatën e Vjenës.

- Një situatë financiare e përmirësuar e të tria kompanive, si dhe në likuiditetet përgjatë 6-mujorit të parë të vitit 2016.

- Mbështetur në nenin 10, pika 2, të ligjit 43/2015, “Për sektorin e energjisë elektrike”, ERE bashkëpunon me ministrinë përgjegjëse për energjinë dhe kjo e fundit në seancën zyrtare publike është shprehur pro shtrirjes së efektit të tarifave dhe çmimeve aktuale të energjisë elektrike edhe për 6-mujorin e dytë të vitit 2016.

Për gjithë sa më sipër cituar, Bordi i ERE-s

VENDOSI:

1. Të lërë në fuqi deri për periudhën 1 korrik 2016 deri më 31 dhjetor 2016, tarifat dhe çmimet e energjisë elektrike, të miratuara përkatësisht me vendimet si më poshtë:

- Vendimin nr. 139, datë 26.12.2014, “Për përcaktimin e tarifës së prodhimit të energjisë elektrike nga KESH sh.a. për vitin 2015”.

- Vendimin nr. 141, datë 26.12.2014, “Për përcaktimin e tarifës për shërbimet ndihmëse të KESH sh.a. për vitin 2015”.

- Vendimin nr. 145, datë 26.12.2014, “Për përcaktimin e tarifës së transmetimit të energjisë elektrike nga OST sh.a. për vitin 2015”.

- Vendimin nr. 146, datë 26.12.2014, “Për përcaktimin e tarifës së shërbimit të shpërndarjes së energjisë elektrike për vitin 2015 në nivelin e tensionit 35 kv”.

- Vendimi nr. 147, datë 26.12.2014, “Për përcaktimin e tarifës mesatare të shërbimit të shpërndarjes së energjisë elektrike për vitin 2015”.

- Vendimi nr. 148, datë 26.12.2014, “Për përcaktimin e çmimeve të shitjes me pakicë të energjisë elektrike për konsumatorët tariforë për vitin 2015”.

2. OSHEE sh.a. për periudhën e mbetur të vitit 2016, përveç shlyerjes së detyrimeve korrente, të kryejë edhe pagesat ndaj KESH sh.a. dhe OST sh.a. nga detyrimet e prapambetura për qëllime të pagesave të kredive nga OST sh.a. dhe KESH sh.a.

3. Përditësimi dhe kompensimi i të gjitha efekteve të mundshme financiare për të licencuarit për periudhën 2015 dhe vitin 2016 do të bëhet në periudhën pasardhëse.

4. Drejtoria e Tarifave dhe e Çmimeve të njoftojë të interesuarit për vendimmarrjen e Bordit të ERE-s.

Ky vendim hyn në fuqi menjëherë.

Ky vendim botohet në Fletoren Zyrtare.

KRYETARI
Petrit Ahmeti